

hasstige Philosophi fürgeschriben vnd angezeigt haben / Tugent-
 sam / Erbar / Redlich vnd Frumblichen zu leben vnd werben: Wer
 wolt auch diser zeit wissen die Wunderbarlichen geschicht vnd
 Seltzamen Historien vnd grosse Wunderthaten der alten Key-
 ser / König / Fürsten / vnd mechtigen Herren: Wer wolt vns diser
 zeit vom Creso / vom grossen Alexandro / vom Dario / vnd vil an-
 dren mehr wissen zusagen / wo die alten unsere Vorältern solches
 nicht mit grossem fleiß vnd vngesparter mühe durch Schrifften
 zu ewiger gedechtnuß gebracht hetten? Vnd gleicher gestalt wie
 disen auffss höchst zu dancken vnd darin großlich zu loben. Also
 sollen herwiderumb die nicht vnbillich gescholten werden / die sol-
 che Schrifft arbeit verstelen / vnd inen selbst als jr eygen erfunden
 ding zuschreiben / vnd kein Scharpffsinnigkeit oder betrachtung
 der vernunft oder verstand s an ire Schrifften legen / sonder auß
 neidt frembden fleiß verfelschen / vnd iren ruhm darin suchen / wel-
 che nicht allein zu schelten / sonder auch schwerer straff vnd Peen
 würdig seind. Das aber auch solches bey den alten nicht vngerö-
 chen bliben / haben wir gut zeugnuß auß ihren vrtheilen vnd iudic-
 cius. Wie aber solche treffliche Schrifften bis zu vnsern zeiten er-
 halten / wollen wir auch in kurtz anzeigen. Die Attalischen König
 auß grosser begirlichkeit vnd sonderm Lust zu der Philologi haben
 erstlichen zu Pergamo jederman zu sonderlicher ergezlichkeit / ein
 herrliche Bibliothecam vñ fast kostbarliche Liberrey auffgericht /
 vnd zusammen gebracht. Nach welchem Ptolemeus auß gleicher
 begird vnd grossem eyfer erbizigt / mit keinem geringern fleiß glei-
 cher gestalt auch ein solche Bibliotheca zu Alexandria auffgericht
 hat. Als er aber vermeint nicht gnugsam sein solche mühe vnd vn-
 kosten angelegt zu haben / verschafft er das solche für vnd für ge-
 mehret vnd gleich als durch ein Samen erhalten werden solte.
 Derhalben er den Musis vnd dem Apollo solche Kampff Spil
 auffgericht vnd verordnet hat / in welchen gleich wie im Fechten
 vnd Kempffen die Athleten / also in disem die Gelehrten zu Kempf-
 fen / der selbig so den syge erlangt wol begabt vnd hoch verehret
 ward. Da nun solche ding alle verordnet vnd angericht waren /
 vnd auch gelerte Leuth zu Richtern erwelet würden. Als aber der
 König in der Statt sechs man erwelet hette / vnd der sibent der
 nicht so bald gefunden werden mocht / manglet / ließ der König
 die so vber die Bibliothec gesezet waren fragen / ob sie jemand
 wusten / haben sie im den Aristophanem angeben / vnd darbei an-
 gezeigt desselbigen fleiß die Bücher solcher Bibliothec teglichen
 zulesen vnd ersuchen / derhalben diser Aristophanes auch in solche
 zahl auffgenommen / vnd den verordneten Sitz besessen. Als aber
 für